

瑜伽師地論卷第三

彌勒菩薩說

唐三藏沙門玄奘奉詔譯

本地分中意地第二之三

復次卽前所說自性乃至業等五事當知皆由三處所攝。謂由色聚故。心心所品故。及無爲故。除餘假有法。今當先說色聚諸法。問。一切法生皆從自種而起。云何說諸大種能生所造色耶。云何造色依彼彼所建立。彼所任持。彼所長養耶。答。由一切內外大種及所造色種子。皆悉依附內相續心。乃至諸大種子未

生諸大以來。造色種子終不能生造色。要由彼生。造色方從自種子生。是故說彼能生造色。要由彼生爲前導故。由此道理說諸大種爲彼生因。云何造色依於彼耶。由造色生已。不離大種處而轉故。云何彼所建立。由大種損益。彼同安危故。云何彼所任持。由隨大種等量不壞故。云何彼所長養。由因飲食睡眠。修習梵行三摩地等。依彼造色倍復增廣。故說大種爲彼養因。如是諸大種望所造色。有五種作用。應知。復次於色聚中。曾無極微生。若從自種生時。唯聚集生。或細或中或大。又非極微集成色聚。但由覺慧分

析諸色極量邊際。分別假立以爲極微。又色聚亦有方分。極微亦有方分。然色聚有分。非極微。何以故。由極微卽是分。此是聚色所有。非極微復有餘極微。是故極微非有分。又不相離有二種。一同處不相離。謂大種極微。與色香味觸等。於無根處有離根者。於有根處有有根者。是名同處不相離。二和雜不相離。謂卽此大種極微。與餘聚集能造所造色處俱故。是名和雜不相離。又此徧滿聚色。應知如種種物。石磨爲末。以水和合。互不相離。非如胡麻綠豆粟稗等聚。又一切所造色。皆卽依止大種處。不過大種處量。乃至

大種所據處所。諸所造色還卽據此。由此因緣說所造色依於大種。卽以此義說諸大種名爲大種。由此大種其性大故。爲種生故。

復次於諸色聚中。略有十四種事。謂地。水。火。風。色。聲。香味。觸。及眼等五根。除唯意所行色。一切色聚有色諸根所攝者。有一切如所說事界。如有色諸根所攝聚如是。有色諸根所依大種所攝聚亦爾。所餘色聚。除有色諸根。唯有餘界。又約相攝有十四事。卽由相攝施設事極微。若約界攝。隨於此聚有爾所界。卽說此聚爾所事攝。若約不相離攝。或內或外所有諸聚。

隨於此聚中。乃至有爾所法相可得。卽說此聚爾所事攝。應知。所以者何。或有聚中。唯一大種可得。如石末尼。眞珠。瑠璃。珂貝。璧玉。珊瑚等中。或池沼溝渠江河等中。或火燄燈燭等中。或四方風輪有塵無塵風等中。或有聚中。二大種可得。如雪。濕樹葉華果等中。或熱末尼等中。或有聚中。三大種可得。如卽熱樹等中。或動搖中。或有聚中。四大種可得。謂於內色聚中。如薄伽梵說。於各別內身。若髮毛等。乃至糞穢。是內地界。若小便等。是內水界。若於身中所有煖等。是內火界。若上行等風。是內風界。如是若於此聚彼相可

得說彼相爲有。若不可得說彼相爲無。

復次聲於一切色聚中。界故說有。相卽不定。由現在方便生故。風有二種。謂恆相續及不恆相續。恆相續者。謂於彼彼聚有恆旋轉風。不恆相續者。謂旋風及空行風。又闇色明色。說名空界及孔隙。又諸闇色恆相續者。謂世界中間。不恆相續者。謂於餘處。如是明色恆相續者。謂於自然光明天中。不恆相續者。謂於餘處。又明闇色。謂於顯色增聚應知。又由依止色聚種子功能故。若遇相似緣時。或小聚無間大聚生。或大聚無間小聚生。由此因緣。施設諸聚有增有減。如

經言。若堅。堅攝。近攝。非近攝。執受。乃至廣說。堅云何。謂地。堅攝云何。謂彼種子。又堅者。卽彼界。堅攝者。謂髮毛等。或土塊等。近攝云何。謂有執受。執受云何。謂內所攝。非近攝云何。謂無執受。無執受云何。謂外所攝。又心心所。所執種子。名近攝。名執受。與此相違。名非近攝。名非執受。又隨逐自身故。名近攝。執受如前說。如是水等界。如理應知。又於一切色聚中。一切時。具有一切大種界。如世間現見乾薪等物。鑽卽火生。擊石等亦爾。又銅鐵金銀等。極火所燒。卽銷爲水。從月愛珠。水便流出。又得神通者。由心勝解力。變大地。

等成金銀等。又色聚有三種流轉。一者長養。二者等流。三者異熟生。長養有二種。一處徧滿長養。二相增盛長養。等流有四種。一長養等流。二異熟等流。三變異等流。四自性等流。異熟生有二種。一異熟體生。名異熟生。二從異熟生。名異熟生。又諸色聚。略說依六處轉。謂建立處。覆藏處。資具處。根所依處。根處。三摩地所行處。

復次於心心所品中。有心可得及五十三心所得。謂作意等。乃至尋伺爲後邊。如前說。問。如是諸心所。幾依一切處心生。一切地。一切時。一切耶。答。五。謂作

意等。思爲後邊。幾依一切處心生。一切地。非一切時。非一切耶。答。亦五。謂欲等。慧爲後邊。幾唯依善。非一切處心生。然一切地。非一切時。非一切耶。答。謂信等。不害爲後邊。幾唯依染汗。非一切處心生。非一切地。非一切時。非一切耶。答。謂貪等。不正知爲後邊。幾依一切處心生。非一切地。非一切時。非一切耶。答。謂惡作等。伺爲後邊。復次。根不壞。境界現前。能生作意。正起。爾時從彼識。乃得生。云何根不壞。謂有二種因。一不滅壞故。二不羸劣故。云何境界現前。謂或由所依處故。或由自性故。或由方故。或由時故。或由顯了不

顯了故。或由全分及一分故。若四種障所不障礙。亦非極遠。謂覆蔽障。隱沒障。暎奪障。幻惑障。極遠有二種。謂處所極遠。損減極遠。云何能生作意正起。由四因故。一由欲力。二由念力。三由境界力。四由數習力。云何由欲力。謂若於是處心有愛著。心則於彼多作意生。云何由念力。謂若於彼已善取其相。已極作想。心則於彼多作意生。云何由境界力。謂若彼境界或極廣大。或極可意。正現在前。心則於彼多作意生。云何由數習力。若於彼境界已極串習。已極諳悉。心即於彼多作意生。若異此者。應於一所緣境。唯一作意。

0092

一切時生。又非五識身有二剎那相隨俱生。亦無展轉無間更互而生。又一剎那五識身生已。從此無間必意識生。從此無間。或時散亂。或耳識生。或五識身中隨一識生。若不散亂。必定意識中第二決定心生。由此尋求決定二意識故。分別境界。又由二種因故。或染汙。或善法生。謂分別故。及先所引故。意識中所由。有由二種因。在五識者。唯由先所引故。所以者何。由染汙及善意識力所引故。從此無間於眼等識中。染汙及善法生。不由分別。彼無分別故。由此道理。說眼等識隨意識轉。如經言起一心。若眾多心。云何安立。

0093

此一心耶。謂世俗言說一心剎那。非生起剎那。云何世俗言說一心剎那。謂一處爲依止。於一境界事。有爾所了別生。總爾所時名一心剎那。又相似相續。亦說名一。與第二念極相似故。又意識任運散亂緣。不串習境時。無欲等生。爾時意識名率爾墮心。唯緣過去境五識無間所生意識。或尋求或決定。唯應說緣現在境。若此卽緣彼境生。又識能了別事之總相。卽此所未了別所了境相能了別者。說名作意。卽此可意不可意俱相違相。由觸了別。卽此攝受損害俱相違相。由受了別。卽此言說因相。由想了別。卽此邪正

0094

俱相違行因相。由思了別。是故說彼作意等思爲後邊。名心所有法。徧一切處。一切地。一切時。一切生。作意云何。謂心迴轉。觸云何。謂三和合。受云何。謂領納。想云何。謂了像。思云何。謂心造作。欲云何。謂於可樂事。隨彼彼行。欲有所作性。勝解云何。謂於決定事。隨彼彼行。卽可隨順性。念云何。謂於串習事。隨彼彼行。明了記憶性。三摩地云何。謂於所觀察事。隨彼彼行。審慮所依心一境性。慧云何。謂卽於所觀察事。隨彼彼行。簡擇諸法性。或由如理所引。或由不如理所引。或由非如理非不如理所引。又作意作何業。謂引

0095

心爲業。觸作何業。謂受想思所依爲業。受作何業。謂愛生所依爲業。想作何業。謂於所緣。令心發起種種言說爲業。思作何業。謂發起尋伺身語業等爲業。欲作何業。謂發動爲業。勝解作何業。謂於所緣。任持功德過失爲業。念作何業。謂於久遠所思所作所說。憶念爲業。三摩地作何業。謂智所依爲業。慧作何業。謂於戲論所行。染汙清淨。隨順推求爲業。

云何建立三世。謂諸種子不離法故。如法建立。又由與果未與果故。若諸果法。若已滅相。是過去。有因未生相。是未來。已生未滅相。是現在。

云何建立生老住無常。謂於一切處識相續中。一切種子相續。俱行建立。由有緣力故。先未相續生法。今最初生。是名生有爲相。卽此變異性。名老有爲相。此復二種。一異性變異性。二變性變異性。由有相似生故。立異性變異性。由有不相似生故。立變性變異性。卽已生時。唯生剎那隨轉。故名住有爲相。生剎那後。剎那不住。故名無常有爲相。如是卽約諸法分位差別。建立四相。

又有四緣。一因緣。二等無間緣。三所緣緣。四增上緣。因緣者。謂種子等無間緣者。謂若此識無間。諸識決

定生。此是彼等無間緣。所緣緣者。謂諸心心所所緣境界。增上緣者。謂除種子餘所依。如眼及助伴法。望眼識所餘識亦爾。又善不善性能取愛非愛果。如是等類。名增上緣。又由種子故。建立因緣。由自性故。立等無間緣。由所緣境故。立所緣緣。由所依及助伴等故。立增上緣。如經言。諸因諸緣能生識者。彼卽此四因緣一種。亦因亦緣。餘唯是緣。

又如經言。善不善無記者。彼差別云何。謂諸善法。或立一種。由無罪義故。或立二種。謂生得善及方便善。或立三種。謂自性善。相應善等起善。或立四種。謂順

福分善。順解脫分善。順決擇分善。及無漏善。或立五種。謂施性善。戒性善。修性善。愛果善。離繫果善。或立六種。謂善色。受。想。行。識。及擇滅。或立七種。謂念住所攝善。正勤所攝善。神足所攝善。根所攝善。力所攝善。覺支所攝善。道支所攝善。或立八種。謂起迎合。掌問訊。禮敬業所攝善。讚彼妙說。稱揚實德所攝善。供承病者所攝善。敬事師長所攝善。隨喜所攝善。勸請所攝善。迴向所攝善。修無量所攝善。或立九種。謂方便無礙。解脫勝進道所攝善。及輒中。上。世。出世道所攝善。或立十種。謂有依善。無依善。聞所生善。思所生善。

律儀所攝善。非律儀非不律儀所攝善。根本眷屬所攝善。聲聞乘所攝善。獨覺乘所攝善。大乘所攝善。又立十種。謂欲界繫善。初二。三。四。靜慮繫善。空無邊處識無邊處無所有處。非想非非想處繫善。無漏所攝善。又有十種。謂十善業道。又有十種。謂無學。正見。乃至正解脫。正智。又有十種。謂能感八福生。及轉輪王善。及趣不動善。如是等類。諸善差別。略說善有二種。義。謂取愛果義。善。了知事及彼果義。不善法者。謂與善法相違。及能爲障礙。由能取不愛果故。及不正了知事故。無記法者。略有四種。謂異熟生。及一分威儀。

路。工巧處。及變化。若諸工巧。但爲戲樂。不爲活命。非習業想。非爲簡擇。此工巧處業。是染汙。餘是無記。如工巧處。威儀路亦爾。變化有二種。謂善及無記。復次眼有一種。謂能見色。或立二種。謂長養眼。異熟生眼。或立三種。謂肉眼。天眼。慧眼。或立四種。謂有瞋眼。無瞋眼。恆相續眼。不恆相續眼。恆相續者。謂色界眼。或立五種。謂五趣所攝眼。或立六種。謂自相續眼。他相續眼。端嚴眼。醜陋眼。有垢眼。無垢眼。或立七種。謂有識眼。無識眼。彊眼。弱眼。善識所依眼。不善識所依眼。無記識所依眼。或立八種。謂依處眼。變化眼。善。

業異熟生眼。不善業異熟生眼。食所長養眼。睡眠長養眼。梵行長養眼。定所長養眼。或立九種。謂已得眼。未得眼。曾得眼。未曾得眼。得已失眼。應斷眼。不應斷眼。已斷眼。非已斷眼。或立十種者無。或立十一種。謂過去眼。未來眼。現在眼。內眼。外眼。麤眼。細眼。劣眼。妙眼。遠眼。近眼。如眼如是。耳等亦爾。是中差別者。謂增三增四。三種耳者。謂肉所纏耳。天耳。審諦耳。四種耳者。謂恆相續耳。不恆相續耳。高聽耳。非高聽耳。三種鼻舌者。謂光淨。不光淨。及被損。四種鼻舌者。謂恆相續。不恆相續。有識。無識。三種身者。謂滓穢處。非滓穢

處。及一切徧諸根所隨逐故。四種身者。謂恆相續。不恆相續。有自然光。無自然光。

或立一種意。謂由識法義故。或立二種。謂墮施設意。不墮施設意。初謂了別名言者意。後謂嬰兒意。又初謂世間意。後謂出世間意。或立三種。謂心意識。或立四種。謂善。不善。有覆無記。無覆無記。或立五種。謂五位差別。一因位。二果位。三樂位。四苦位。五不苦不樂位。或立六種。謂六識身。或立七種。謂依七識住。或立八種。謂增語觸相應。有對觸相應。依耽嗜。依出離。有愛味。無愛味。世間。出世間。或立九種。謂依九有情居。

或立十種者無。或立十一種如前說。或立十二種。卽十二心。謂欲界善心。不善心。有覆無記心。無覆無記心。色界有三心。除不善。無色界亦爾。出世間心有二種。謂學及無學。

或立一種色。謂由眼所行義故。或立二種。謂內色。外色。或立三種。謂顯色。形色。表色。或立四種。謂有依光明色。無依光明色。正不正光明色。積集住色。或立五種。謂由五趣差別故。或立六種。謂建立所攝色。覆藏所攝色。境界所攝色。有情數色。非有情數色。有見有對色。或立七種。謂由七種攝受事差別故。或立八種。

謂依八世雜說。一地分雜色。二山雜色。三園林池沼等雜色。四宮室雜色。五業處雜色。六彩畫雜色。七鍛業雜色。八資具雜色。或立九種。謂若過去。若未來。若現在。若麤。若細。若劣。若妙。若遠。若近。或立十種。謂十種資具。

或立一種聲。謂由耳所行義故。或立二種。謂了義聲。不了義聲。或立三種。謂因受大種聲。因不受大種聲。因俱大種聲。或立四種。謂善。不善。有覆無記。無覆無記。或立五種。謂由五趣差別故。或立六種。一受持讀誦聲。二請問聲。三說法聲。四論議決擇聲。五展轉言

教若犯若出聲。六喧雜聲。或立七種。謂男聲。女聲。下聲。中聲。上聲。鳥獸等聲。風林叢聲。或立八種。謂四聖言聲。四非聖言聲。四非聖言者。一不見言見。見言不見。非聖言。二不聞言聞。聞言不聞。非聖言。三不覺言覺。覺言不覺。非聖言。四不知言知。知言不知。非聖言。四聖言者。一見言見。不見言不見。聖言。二聞言聞。不聞言不聞。聖言。三覺言覺。不覺言不覺。聖言。四知言知。不知言不知。聖言。又有八種。謂四善語業道。四不善語業道。或立九種。謂過去。未來。現在。乃至若遠若近。或立十種。謂五樂所攝聲。此復云何。一舞俱行聲。

二歌俱行聲。三絃管俱行聲。四女俱行聲。五男俱行聲。六螺俱行聲。七腰等鼓俱行聲。八岡等鼓俱行聲。九都曇等鼓俱行聲。十俳叫聲。

或立一種香。謂由鼻所行義故。或立二種。謂內及外。或立三種。謂可意。不可意。及處中香。或立四種。謂四大香。一沈香。二窵堵魯迦香。三龍腦香。四麝香。或立五種。謂根香。莖香。葉香。華香。果香。或立六種。謂食香。飲香。衣香。莊嚴具香。乘香。宮室香。或立七種。謂皮香。葉香。素泣。謎羅香。栴檀香。三辛香。熏香。末香。或立八種。謂俱生香。非俱生香。恆續香。非恆續香。雜香。純香。

猛香。非猛香。或立九種。謂過去未來現在等如前說。或立十種。謂女香。男香。一指香。二指香。唾香。洩香。脂髓膿血香。肉香。雜糅香。淤泥香。

或立一種味。謂由舌所行義故。或立二種。謂內及外。或立三種。謂可意等如前說。或立四種。謂大麥味。稻味。小麥味。餘下穀味。或立五種。謂酒飲味。非酒飲味。蔬菜味。林果味。所食味。或立六種。謂甘苦等。或立七種。謂酥味。油味。蜜味。甘蔗變味。乳酪味。鹽味。肉味。或立八種。如香說。或立九種。亦如香說。或立十種。謂可嚼味。可噉味。可嘗味。可飲味。可吮味。可爆乾味。充

足味。休愈味。盪滌味。常習味。後五謂諸藥味。

或立一種觸。謂由身所行義故。或立二種。如香說。或立三種。謂可意等。或立四種。謂摩觸。搦觸。打觸。揉觸。或立五種。謂五趣差別。又有五種。謂蚊蝥蚤蝨蛇蠍等觸。或立六種。謂苦樂。不苦不樂。俱生。所治攝。能治攝。或立七種。謂堅鞭觸。流濕觸。煖觸。動觸。跳墮觸。摩按觸。身變異觸。謂濕滑等。或立八種。謂手觸。觸。塊觸。觸。杖觸。觸。刀觸。觸。冷觸。觸。煖觸。觸。飢觸。觸。渴觸。觸。或立九種。如香說。或立十種。謂食觸。飲觸。乘觸。衣觸。莊嚴具觸。牀座觸。机橙臺枕及方座觸。女觸。男觸。彼二

相事受用觸。

略說法界。若假若實。有八十七法。彼復云何。謂心所
 有法。有五十三。始從作意。乃至尋伺。為後邊。法處所
 攝色。有二種。謂律儀不律儀所攝色。三摩地所行色。
 不相應行。有二十四種。謂得無想定。滅盡定。無想異
 熟。命根。眾同分。異生性。生。老。住。無常。名身。句身。文身。
 流轉。定異。相應。勢速。次第。時。方。數。和合。不和合。無為
 有八事。謂虛空。非擇滅。擇滅。善。不善。無記法。真如。不
 動。想。受。滅。如是無為。廣八略六。若六若八。平等平等。
 復次法界。或立一種。謂由意所行義。或立二種。謂假

所攝法。非假所攝法。或立三種。謂有色。無色。及有為
 無為。或立四種。謂有色。假所攝法。無色。心所有所攝
 法。無色。不相應。假所攝法。無色。無為。假非假所攝法。
 或立五種。謂色。心所有法。心不相應行。善無記。無為。
 或立六種。謂受。想。相應行。不相應行。色。無為。或立七
 種。謂受。想。思。染。汙。不染。汙。色。無為。或立八種。謂善。不
 善。無記。受。想。行。色。無為。或立九種。謂由過去。未來。等
 差別。或立十種。謂由十種義。一隨逐生義。二領所緣
 義。三取所緣相義。四於所緣造作義。五即彼諸法分
 位差別義。六無障礙義。七常離繫義。八常非離繫義。

九常無顛倒義。十苦樂離繫義。非受離繫義。及受離繫義。如是若內若外。六處所攝法。差別分別有六百六十。

復次。屢觀眾色。觀而復捨。故名爲眼。數數於此聲。至能聞。故名爲耳。數由此故。能嗅諸香。故名爲鼻。能除飢羸。數發言論。表彰呼召。故名爲舌。諸根所隨。周徧積聚。故名爲身。愚夫長夜。瑩飾藏護。執爲己有。計爲我所。我及我所。又諸世間。依此假立。種種名想。謂之有情人。與命者。生者。意生。及儒童等。故名爲意。數可示現在其方。所質量可增。故名爲色。數宣數謝。隨增

異論。故名爲聲。離質潛形。屢隨風轉。故名爲香。可以舌嘗。屢招疾苦。故名爲味。數可爲身之所證得。故名爲觸。徧能任持。唯意境性。故名爲法。如是等類。諸法差別。應知。此中重說。嗚柁南曰。

自性。及所依。所緣。助伴。業。由此五種門

諸心差別轉

此中顯由五法。六識身差別轉。謂自性故。所依故。所緣故。助伴故。業故。又復應知。蘊善巧攝。界善巧攝。處善巧攝。緣起善巧攝。處非處善巧攝。根善巧攝。又復應知。諸佛語言。九事所攝。云何九事。一有情事。二受

用事。三生起事。四安住事。五染淨事。六差別事。七說者事。八所說事。九眾會事。有情事者。謂五取蘊。受用事者。謂十二處。生起事者。謂十二分緣起及緣生。安住事者。謂四食。染淨事者。謂四聖諦。差別事者。謂無量界。說者事者。謂佛及彼弟子。所說事者。謂四念住等菩提分法。眾會事者。所謂八眾。一刹帝利眾。二婆羅門眾。三長者眾。四沙門眾。五四大天王眾。六三十三天眾。七欲摩天眾。八梵天眾。又嗚柁南曰。

色聚相應品 世相及與緣 善等差別門

巧便事為後

瑜伽師地論卷第三

音釋

瞋

輪閏切机機舉履切澄澄丁鄧切

目動也机